

Alt Nussnagger



„D'Tschoppehöfler“

1.

Mer wai-nech hütte dais und dieses säge,
Was öbbe bi de Baselbieter goht;
Wie do und dört me tuet erwäge,
Öb Stadt und Land sich au verschmelze lot,
Und Vorträg gits, vo Schönebuech bis Ammel,
Voll Seifischuum bigott scho mäenge hangt;
Der gseht, wie licht me-n-eusi Rammel
Mit ächte Basler Strübli fangt.

2.

Am erste-n-Augst wär 's Fyrwärgg gwis gsi Krone,
Isch aber laider erst am zwaite ko;
Doch d'Zinfli lehn nit mit sich flohne,
Hän sälber kreftig Funke sprieje lo.
Valuta-Wy, lehn-si in ihri Kräge,
Derzue sin no die Gratis-Klepfer ko;
Uf aimol gährt dä ganzi Säge,
Zum Schluss isch 's grossi Bouquet ko.

3.

Es isch die halbi Stadt an Bahnhof gsprunge,
Wo 's ghaisse het, der Dodo tät hit ko;
Und zwar nit ebbe nur die junge,
Nai, au die alte Duple sin no ko.
Do raist-er a, uf drei, statt uf vier Fiesse,
(Dä Abligg gly der ganz Willkomm verhunzt)
Und het, statt 's Publikum z'bigriesse,
In nägste beste-n-Egge brunzt.

4.

Es hänn nit schlächt kurz d'Lyt vom Läder zoge
Und mäenge Stupfer au vo Stappel glo,
Will ain vo unsre Pädagoge
Ganz rudelwys die Knopfli tuet verschlo.
Dä soll doch heere mit sym Dureprigle
Und wisse, dass-er schwär im Irrtum isch,
Will doch e sone Buebéfidle
Kai Basler Fasnachtstrummle-n-isch.

5.

Me darf in Basel mit de Kinderwäge
Uf hech'ri Wysig d' Trottoir nimm bigoh,
Und 's isch der ganzi Kindersäge
Jetz uff der Stross im Schicksal iberlo.
's wär netig bald, dass hie e jedi Zofe,
Damit-me-n-uf der Stross si jo nit fleppt,
In Zuekunft ihri klaine Gofe
Im Ruggsagg ummenanderschleppt.

6.

Wär hit no schwärmt firs alti, scheni Tanze
Und luegt per Zuefall jetz de neie zue,
Dä kriegt vo son're Charleston-Pflanze
Fir langi Zytt ganz sicher wieder gnue.
Denn wenn-me seht so aine mit sym Schuggi,
Wie-n-är bim Tanz sy Knochegstell verrängt,
So macht e Falle grad dä Luggi,
Wie ain, wo frisch am Galge hängt.

7.

In Zuekunft wärde kaini Pinkt me gschunde,
Das alles isch jetz hit scho iberholt;
's het ain e-n-Apperat erfunde,
Mit däm me d'Pinkt halt aifach nur no rollt.
Punktrolle tuet sogar der Pappe d' Mamme,
Doch gfärlig wird's, wenn är derby verirrt,
Und wenn si allerliebste Flamme
Statt dinner, nur no dicker wird.

8.

Als Dienstmägd tien sich z'Basel jingst verkleide
Zwai Poliziste-n-an der Spittelstross;
Als Suffragette däne baide
Dä neii Bruef stoht wirglic ganz famos.
's kunnt no so wytt, das glaubet mir, jowäger,
Dass nägstens mir erläbe no die Stund,
Wo d' Schuggerei als Kemmifäger
Ins Kundehuus ko ruesse kunnt.